



• СӘТІ ТҮСКЕН СҰХБАТ

ЗАН

ZANMEDIA.KZ

✉ zangazet@mail.ru

№77 (3706)
8 қазан 2024



газеті

Қоғамдық-саяси, құқықтық газет

• БҮГІНГІНІҢ БАС ТАҚЫРЫБЫ

ҚАЗАҚСТАНДЫҚТАР ӨЗ ТАҢДАУЫН ЖАСАДЫ



Қазақстан атом электр стансасын салуда жалпыхалықтық референдум арқылы шешім қабылдаған Азиядағы алғашқы, ал әлемдегі бесінші елге айналды. Бұған дейін мұндай референдумдар Австрия (1978), Швейцария (1979, 2017), Швеция (1980) және Италияда (1987, 2011) өткен болатын.

Қазақстанда АЭС салу мәселесі 1990 жылдардың екінші жартысынан бастап қоғамда қызу талқылануы келе жатыр. Бұл бағыттағы жұмыстар 1999 және 2006 жылдары жобалар техникалық-экономикалық негіздеме сатысына, ал 2014 жылы жеткізушілердің ұсыныстарын қарауға дейін жеткенімен, шешім қабылдау түрлі себептермен кешеуілдеп қалды. Сондықтан Мемлекет басшысы былтырғы жолдауында атом энергетикасын дамыту аса маңызды экономикалық және саяси мәселеге айналғанын және атом электр станциясын салу қажет пе, жоқ па деген сауалға қатысты түрлі пікір бар екенін атап өтті.

(Соңы 3-бетте)

Роза САДЫҚОВА,
Жекеменшік білім ұйымдары
республикалық қауымдастығының
төрайымы:

«ЖЕКЕ МЕКТЕП МҰҒАЛІМДЕРІ ҚОЛДАУДАН ТЫС ҚАЛМАУЫ КЕРЕК»

– Роза Шәріпқызы, қазіргі таңда еліміздегі жекеменшік мектептердің саны мен олардың жалпы білім беру жүйесіндегі үлесі қандай?

– Қазақстанда жекеменшік мектептер ел Конституциясымен кепілдендірілген. Мемлекет орта білімге қол жеткізуді қамтамасыз етуге жәрдемдеседі. Тәуелсіздіктің 30 жылдан астам уақытында еліміздегі мемлекеттік емес мектептер саны 1993 жылы 11 болса, 2021–2022 оқу жылы 500-ге, 2023–2024 жылы 735-ке дейін өсті. Бүгінде 250 мыңнан астам қазақстандық оқушы жекеменшік мектептерде білім алуға. Бұл елдегі бүкіл мектеп жасындағы балалардың 1 пайызы деуге болады.

Жекеменшік мектептер мен мектепке дейінгі оқыту және тәрбиелеу желісінің дамуы мемлекет тарапынан тиісті қолдаудың болуына байланысты. «Білім туралы» заңға сәйкес, жекеменшік білім ордалары барлық деңгейдегі білім бойынша мемлекеттік білім беру тапсырысын алуға құқылы.

– Білім саласындағы бастамаларды табысты іске асыруда жекеменшік білім беру секторының да өзіндік үлесі бар екеніне ешкім дау айта алмасы анық.

– Дұрыс айтасыз. Тек шағын және орта кәсіп өкілдері ғана емес, ірі кәсіп өкілдері де білім саласының дамуына қомақты қаржы жұмсап отыр. Бұл үздік көрсеткіш болып табылады. Жекеменшік білім саласын дәріптеп, танытып жүрген, бүгінгі таңда оларды еліміздегі маңдайалды жекеменшік білім ордасына айналдырған тұлғалар да аз емес.

Егемен Қазақстанның жекеменшік білім беру секторы уақыт сынағынан сүрінбей өтіп, қиындықтарды өзгелермен бірге еңсерді. Еліміздің ертеңі – жас ұрпақтың болашағын ойлап, олардың жан-жақты, терең білім алып, өнегелі болып өсуін өздерінің өмірлік мұраты деп санаған азаматтар тәуелсіздіктің алғашқы жылдарынан бастап-ақ білім саласының дамуына қомақты қаржыларын салып, ерен еңбегімен егемен Қазақстанның жекеменшік білім саласының берік іргетасын қалады. Бүгінгі таңда жекеменшік білім беру мекемелері еліміздің Астана, Алматы және Шымкент сынды экономикасы дамыған аймақтары мен барлық облыстарында бой көтеріп, алысқа құлаш сермеп, қанатын кеңге жаюда.

(Соңы 5-бетте)

• МЕЖЕ

СУДЬЯЛАРДЫҢ ІХ СЪЕЗІ: СОТ ЖҮЙЕСІН ОДАН ӘРІ ДАМУ БАҒЫТТАРЫ АЙҚЫНДАЛДЫ

Астанада өткен Қазақстан судьяларының кезекті ІХ съезі сот қауымдастығы өміріндегі айтулы оқиға болды.

Қазақстан Республикасы судьяларының ІХ съезіне 500-ден астам адам жиналды. Олардың 188-і делегат болса, қалғандары осынау алқалы жиынға арнайы шақырылған Парламент депутаттары, орталық мемлекеттік және құқық қорғау органдарының, заңгерлік қауымдастықтың, халықаралық ұйымдар мен үкіметтік емес ұйымдардың басшылары.

Съезге Қазақстан Республикасының Президенти Қасым-Жомарт Тоқаев қатысып, сөз сөйледі. Мемлекет басшысы бұл орайда судьялар жұмысына, олардың заң үстемдігін қамтамасыз етудегі рөліне тоқталып, сот төрелігін жүзеге асыру және азаматтардың құқықтарын қорғаудың жауапты миссиясына қолдау мен көңіл бөлуін дәлеліне айналған іс-шараның ерекше мәртебесі мен маңыздылығын атап өтті. Өз кезегінде Қазақстан Республикасы Жоғарғы Сотының төрағасы Асламбек Мерғалиев съезд делегаттары мен шақырылғандар алдында сөз сөйлеп, ХІІІ съезден кейінгі жылдардағы сот жүйесінің жетістіктерін атап өтіп, сот қауымдастығы алдында тұрған міндеттерді айқындап берді.

Халықаралық құқықтық қоғамдастықтың өкілдері – Сот төрелігінің тиімділігі жөніндегі Еуропалық комиссияның (СЕРЕУ) президенті Франческо Денаскуале, Сот әкімшілігінің халықаралық қауымдастығының президенті Луис Пальма, Астанадағы ЕҚЫҰ Бағдарламалар офисінің басшысы Фолькер Фробарт съезге қатысушыларға жемісті жұмыс тіледі.

Съезд мінберінде көтерілген мәселелердің кең ауқымы сот жүйесінің қызметіне, сот тәуелсіздігін қамтамасыз етуге, судьялардың мінез-құлқындағы кәсіби және этикалық нормаларды сақтауға қатысты болды.

Съезд делегаттары өзекті мәселелерді талқылап, сот тәжірибесінің түрлі аспектілері, халықтың әділет органдарына сенімін арттыру, сот жүйесін одан әрі дамыту перспективалары туралы пікір алмасты.

Сот төрелігі саласындағы заманауи үрдістерді талқылауға Жоғарғы Соттың судьясы Г.Мерғенова, Астана қаласының Әкімшілік істер жөніндегі апелляциялық сот алқасының төрағасы Д.Әбдіғалиев, Ақтөбе қалалық сотының судьясы И.Досова қатысып, өз ойларын ортаға салды.

Дәстүр бойынша съезд делегаттары екі съезд арасындағы кезеңде соттың өзін-өзі басқару қоғамдық ұйымының қызметіне қатысты мәселелерді де талқыға салды.

Съезде ҚР Судьялар одағының төрағасы Сәкен Абдолла баяндама жасап, сот жүйесіне жүктелген міндеттерді атқаруда аса маңызды функцияларды біріктіруге, кәсіби тәжірибе мен озық шетелдік тәжірибе алмасуға арналған іс-шараларды ұйымдастыруға, халықаралық ынтымақтастықты нығайтуға бағытталған жұмыстар және тағы басқа да жүзеге асырылған білім беру, мәдени және спорттық іс-шараларды ортаға салды.

(Соңы 3-бетте)

